

Compañia Investimentu Timor-Leste (CITL), investe ka fakar osan?

Husi La'o Hamutuk,

**Instituto Timor-Leste ba Monitorizasaun no Analiza Desenvolvementu*

Publika ona iha Timor Post no Suara Timor Lorosa'e, 9-10 Novembru 2011

Iha semana ida liu ba, La'o Hamutuk hakerek artigu ida ba jornal lokal balu iha Dili, ho titulu "*Orsamentu Jeral Estadu 2012 ha'belit liu tan Malisan Rekursu ba Timor-Leste*", hodi mensiona mos Compañia Investimentu Timor-Leste (CITL) nudar ezemplu husi projetu bo-boot ne'ebe sei hadalan tan Malisan Rekursu. Nune'e, iha artigu ne'e, ami sei foka liu ba ami nia duvida ba planu investimentu iha futuru husi alokasaun tokon \$200 husi Orsamentu Jeral Estadu 2012 ba Compañia Investimentu Timor-Leste ne'e.

Em prinsipiu La'o Hamutuk konkorda katak presiza duni diversifikasaun husi Fundu Petroleu Timor-Leste ba seitor sira ne'ebe produtivu atu bele aumenta ekonomia Timor-Leste. No ami hare katak estabesimentu CITL ne'e nudar parte husi esforsu Ministeriu Finansa nian ne'ebe durante ne'e hetan presaan balu iha rai laran atu investe Fundu Petroleu iha rai laran ne'ebe sei iha risku boot, no dala ida tan ami apresia ba esforsu ida ne'e.

Maibe, diversifikasaun ne'e sei furak liu tan, bainhira Governu hakarak investe osan sira ne'e ba iha investimentu ne'ebe iha tiha ona, laos atu investe iha projeitu iha compania foun.

Hanesan planu ne'ebe haktuur iha livro orsamentu estadu 2012 nian lahatudu justifikasaun retornu husi investimentu ne'e hodi lori ita atu fakar tiha deit osan sira ne'e ba buat ida ne'ebe mayoria povo Timor-Leste la bele aproveita iha futuru.

Nune'e ami enkoraza ba Governu atu konsidera investimentu fiksi balu ne'ebe sei ajuda Timor-Leste, hodi jere ajensia otonomu estadu balu ho diak, hanesan EDTL, Aportil, ka investe iha Timor-Telekom ne'ebe bele ajuda estadu atu hadiak nia jestaun ba nia istituisaun no mos bele hasae rendimentu estadu nian. Maibe, investimentu sira ne'e tenke mai husi prosesu ida ne'ebe transparente, iha koridor boa-governasaun. Tamba investimentu sira hanesan ne'e dala barak bele hamosu korupsiun, kolusaun, nepotismu, kronismu, favoritismu no seluk tan.

Historia CITL

Iha 3 Junhu 2011, Konseilu Ministru aprova Dekretu-Lei 41/2011 atu estabese Compañia Investimentu Timor-Leste (CITL), no foin ofisialmente publika iha *gazette* ofisial estadu nian, *Jornal da Republica* iha 21 Setembru 2011. Governu hateten katan CITL sei "promove oportunidade investimentu dezenvolvimentu no kresimentu riku-soin nasional, lidera projeitu stratejiku importante ho impaktu komersial ne'ebé signifikante

Komunikadu Imprensa Governu iha loron 11 Junhu 2011 fo sai katak CITL "moris atu direktamente atrai investimentu estranjeiru sira liu husi fo insentivu komersial. Governu hanoin katak CITL ne'e hanesan ho Compañia Investimentu *Temasek Holding* husi Singapura, ne'ebe Governu mak nain. CITL sei tarjeita seitor investimentu tuir nesesidade no return no investimentu bazeia ho baze komersial ida ne'ebe maka'as hodi aseleira dezenvolvimentu. CITL bele parseria atu hari'i hotel, fabrika ka komersial seluk ne'ebe hakarak atu hetan. Iha fase dezenvolvimentu, CITL nia mandatu lahanesan ho Fundu Petroleu, CITL atu investe deit iha Timor-Leste."

Temasek Holding, Compañia investimentu Singapura ne'e rasik, hahu husi planu Governu nian ne'ebe rekolha asoens husi Compañia kiik sira ne'ebe halai iha seitor produtivu no industria ne'ebe fabrika roo ahi ba iha Ministeriu Finansa nia okos. Bainhira *Temasek Holding* ne'e estabese ona iha 1974, asoens sira ne'e jere husi Compañia investimentu ne'e no Ministeriu Finansa Singapura mak nain uniku ba asoens *Temasek Holding* nian.

Maske Governu hateten CITL ne'e atu hanesan ho *Temasek Holding*, maibe Intermus nia planu investimentu, *Temasek Holding* diferente ho CITL. Besik 70% husi investimentu *Temasek* nian iha rai-liur no restu investe iha Singapura laran. Nia iha parseria ne'ebe klaru, ho tarjeitu investimentu ne'ebe klaru no profitavel, investe iha kompania, laos projeitu, la depende ba injeksaun husi Governu hanesan CITL nian.

Planu Governu ba CITL

Iha proposta Orsamentu 2012 ne'e, Governu propoin atu aloka tokon \$200 nudar osan fini ba Compañia Investimentu Timor-Leste (CITL) ne'e. Alokasaun ida ne'ebe boot liu kompara ho alokasaun tomak ba seitor edukasaun, saude no Polisia. Livro Orsamentu No.1 ekspeta CITL atu ajuda "dezenvolve Timor-Leste hodi diversifika ekonomia sustentavel liu husi transfere riku-soin Fundu Petroleu ba iha ekonomia naun petroleu, liu husi kresimentu ekonomia no diversifikasaun husi ekonomia ne'ebe depende uniku ba petroleu no gas ba ekonomia naun petroleu," maibe CITL ne'e rasik la mensiona iha Planu Asaun husi Ministeriu ruma.

Iha Planu Estratejiku Dezenvolvimentu Nasional (PEDN) mensiona Compañia investimentu ne'e nudar Ajensia Investimentu Timor-Leste, maibe laiha informasaun sufisiente husi PEDN ba asuntu ne'e.

Iha proposta orsamentu estadu 2012, Governu aloka tokon \$200 ba CITL atu halo projeitu sira, ezemplu mak:

1. Fiu internet iha tasi okos hodi liga ba parte seluk iha mundu, ne'ebe sei halo Timor-Leste nudar lider mundial ba iha asesu internet.
2. Kualidade *benchmark* husi projeitu turismu (otel no seluk tan) atu komesa hodi hahu'u turismu.

3. Uma andar ba edifisiu atu garante operadores komersial seluk labele hetan vantajem husi posisaun oligopolistic liu husi aluga merkadu nivel altu ba seitor privadu inklui instrumental Governu nian.
4. Investimentu stratejiku seluk hanesan pasajeiru no asesu atu tula sasan ho presu ne'ebe justu.
5. Kompaun ba kompras ho kualidade as atu stimula potensial turista. Presu iha Timor-Leste ne'ebe kiik, halo ida ne'e besik atu livre, sei fo lisensa ho presu baratu liu iha rejiaun ne'e, ne'ebe sei kompete ba turista atu buka produtu sira ho kualidade as.

Duvida ba CITL atu fo retornu

Iha La'o Hamutuk nia submisaun ba Komisaun C Parlamentu Nasional kona-ba Orsamentu Jeral Estadu 2012, ami ekspresa ami nia duvida ba investimentu husi tokon \$200 ne'e atu fo retornu ba estadu Timor-Leste.

Prosesu estabesimentu CITL ne'e rasik laiha konsultasaun publiku ruma. CITL kria sein ho partisipasaun husi publiku no Parlamentu. Nia estrutura, regulasaun, lideransa no nia staf seidak define lolos. Laiha rekerimentu ba relatoriu ne'ebe eziste, laiha transparensia, no iha kontrolu oituan deit kona-ba oinsa osan publiku nian sei uza ba. Nune'e, dada korupsaun hodi belit liu tan iha Timor-Leste hodi aumenta pobreza ba povo sira tamba osan publiku nian benefisia deit ema balu.

Proposta orsamentu ne'e rasik la fo informasaun ne'ebe suficiente ba Parlamentu kona-ba ba entidade ida ne'ebe iha direitu eskluзивu atu halao nia funsaun administrativa, finansas, jestaun ba nia asset ho "ho autonomia".

Nune'e ami rekomenda ba Parlamentu Nasional, ne'ebe sei aprova orsamentu estadu atu aloka deit osan ba projetu ne'ebe ho lojikamente bele fo retornu. Tamba ami hare katak CITL hanesan Livro 1 Orsamentu estadu 2012 fo sai ne'e labele promete ekspetasaun ba retornu, hanesan tuir mai:

- Oinsa kabela internet iha tasi okos ba nasaun seluk bele halo Timor-Leste bele "lidera mundial iha asesu internet" bainhira laiha nasaun vizinhu ruma mak sai hanesan lider, no ita nia internet sei depende ba sira nia internet?
- Oinsa ita nia povo sei hetan benefisia husi uma andar as ne'ebe sei kua tiha merkadu komersial *real estate*, hodi fo subsidi ba Compañia rai-liur no entidade governu, no iha parte seluk labele ona atrai seitor privadu ba investimentu *real estate*?
- Bele kah sentru kompras ho kualidade as bele oferese "presu ba kustu ne'ebe baratu liu iha rejiaun," hodi atrai turista sira husi rai-liur atu mai sosa sasan luxu husi importasaun iha Timor-Leste?, benefisiu saida mak ita nia nasaun no ita nia sidadaun sira sei simu husi subsidi ba buat kompleksu ne'e, ne'ebe mos halo ita nia taxa importasaun sai kiik, ka dala ruma besik gratuitu? Oinsa Timor-Leste bele sosa sasan ho folin karun, no fan ho folin baratu liu, hanesan parte husi investimentu?

Planu ne'e sei lori Timor-Leste atu fo subsidi ba ema riku no turista sira deit, no laiha benefisiu ba povo kiak. Karik Timor-Leste hanoin atu investe iha seitor sira ne'ebe stratejiku, ami hare mall luxu, internet, real estate laos planu ne'ebe stratejiku, tamba ne'e bele entrega ba kompania ka seitor privadu sira atu investe no bele selu taxa ba estadu. sira sei la fo kampu servisu barak ba Timor-Leste, nune'e triste liu bainhira ita gasta osan publiku nian barak ba buat sira ne'ebe benefisia deit ema riku sira.

Konkluzoan

Tuir ami nia perspetiva, planu ne'e la refleta nesidade husi mayoria Timor-oan ne'ebe luta hela atu hadiak sira nia moris, tamba projeitu CITL ne'e klaramentu atu gasta deit osan. Ita iha osan ohin loron, tamba osan minarai sei suli mai durante ne'e, no karik ita laiha ona rezerva petroleu iha futuro, buat sira ne'e sei haterus liu tan mayoria povo Timor-Leste nia moris.

Maske ita presiza asesu ba internet no buat diak balu ba komunidadade tomak, maibe ita tenke realistiku katak ita nia seitor edukasaun no saude presiza liu atensaun husi estadu rasik, duke ba projeitu ne'ebe ita duvida hela ba nia retornu iha futuro, estudantes sira presiza kadeira, livru, biblioteka no mestre sira molok sira bele hetan vantajem optiku internet nian, no povo presiza hahan saudavel no be'e mos molok sira bele kompras iha mall luxu.

Nune'e ita espera katak Parlamentu Nasional bele foti desizaun ida ne'ebe diak no matenek liu bainhira sira diskute no aprova orsamentu estadu ba tinan 2012. Ami suzere atu projeitu CITL ne'ebe aloka tokon \$200 ne'e kansela tiha deit, bainhira ita gasta deit osan publiku nian. Ezemplu balu mak ita tenke uza hanesan esperiensa mak projeitu eletrisidade oleo pezadu ne'ebe gasta osan barak hela no nia kustu to'o ohin loron la klaru. Aleinde ne'e, ita mos tenke aprende husi esperiensa governasaun rezimu ditadura Soeharto iha Indonezia ne'ebe halo buat barak ba interese kronismu nian ne'ebe ikus mai fo konsekuensia at ba povo mayoria. Dala ida tan ita espera katak esperiensa sira ne'e labele repete tan.

Obrigado barak

***Karik hakarak atu hatene liu informasaun ne'e, bele vizita www.laohamutuk.org, ka kontaktu info@laohamutuk.org, +670 332-1040.**